

Niopa amatlahcuilol tlen oquihcuiloh in teotlatitlantli

# Juan

## **Juan quintlahpaloua in tlaniltocanih**

<sup>1</sup>Neh tlayacanqui innauac in tlaniltocanih, inmitzontlahcuilulia touatzin siuatzintli tlapihpintli uan moconeuantzitzin, naquin milauac innamechontlasohtla, uan amo san yen neh, tla yeh noiuiqui nochtin naquin yoquixmatqueh in tlen milauac.

<sup>2</sup>Innamechontlasohtla nic itpiah in tlen milauac itich in toyolo uan touan isqui ica in sintitl nochipa.

<sup>3</sup>In toTahtzin Dios uan toTecotzin Jesucristo, iConetzin Dios, manamechonpialican tetlasohitalistli, teicnoitalistli, uan manamechomactican seuilistli, uan ohcon xonchanchiuacan itich in tlen milauac uan itich in tetlasohtlalis.

## **Matninimican itich in tetlasohtlalis**

<sup>4</sup>Simi onipac nic onquimahsicsiqui moconeuantzitzin ninimih itich in tlen milauac, ohcon quemeh technauatia in tlanauatil tlen otechmactih in toTahtzin Dios.

<sup>5</sup>Uan axan, siuatzintli, inmitzontlatlautia, matmosepantlasohtlacan itnochtin. Nin tlen inmitzonihcuilulia amo se yancuic tlanauatil, tla yeh sayeh tlen ya momati, in tlen itquixmatih ya nochipa.

<sup>6</sup>Secpias in tetlasohtlalis ictosniqui seninimis quemeh Yehuatzin molanauatilia. Uan nitlanauatiltzin yeh yen nin: Matninimican itich in tetlasohtlalis, ohcon quemeh ya nancoualcactiueh nochipa.

## **Quenih sequixmati nintlamachtilis in tlachacayauanih**

<sup>7</sup>Pues miqueh tlachacayauanih ninimih itich in talticpac, naquin icteixpantiah Jesucristo amo oualmouicatzinoh quemeh se tlatatl. Naquin ohcon icteixpantia yehua tlachacayauani uan yehua in anticristo.

<sup>8</sup>Ica non namehuantzitzin cuali xonmoyectlachialihtocan, uan ohcon amo mai sannencah namotiquitzin, yehyeh ixconsilican ahsitoc in mouistic tlaxtlauil.

<sup>9</sup>Nochi naquin icniqui icpahpanauis nitlamachtilis Cristo, amo icpia

Dios itich niyolo. Naquin motlachicauilihtoc itich nitlamachtilis in Cristo, yeh quemah icpia itich niyolo in toTahtzin Dios uan ni-Conetzin.

<sup>10</sup>Tla acah uitz namonauac uan amo cualica nin itlamachtilis Cristo, amo ixconsilican itich namocalihtic, dion ixconiluican: “¡Xonmoseuihtzino!”

<sup>11</sup>Porque naquin icyecsilia, teuanti itich niamocualichiualis.

### Juan motlaminahnauatia

<sup>12</sup>Inpia mic tlen inniqui innamechoniluis, pero amo inniqui innamechoniluis itich amatl, pues inyoluihtoc nias innamechonitatu uan inmonohnotzas namouantzin uan ohcon ya yec itpaquisqueh.

<sup>13</sup>Niconeuan mocnitzin, naquin noiuqui tlahpihpinalsiuatzintli, mitzontlahpalouah. [Amén.]